



# AMATEEKA ANA (4) PALAMENTI EYE 11 G'EYISIZZA OKUKYUSA EMBEERA Y'OMUNTU WA BULIJJO



Amyuka Sipiika wa Palamenti, Thomas Tayebwa



Sipiika wa Palamenti, Anita Annet Among



Akulira oludda oluwabula mu Palamenti, Mathias Mpuuga

# Palamenti by'ekoze mu mwaka ogwokubiri byeyogerera

Bya MUSASI WAFFE

OMWAKA gwa Palamenti ogwokubiri gwalimu entuula 105 mwe baayisiza amabago g'amateeka 33, okulayiza ababaka musanvu, okuyisa ebiteeso eby'enjawulo 37 ate nga lipooti ezaayisibwa zaali 37.

Pulezidenti Museveni ye yaggulawo omwaka ogwokubiri ogwa Palamenti ye 11 nga June 7, 2022 okwawerekerwa okusoma Embalirira y'eggwanga nga June 14. Ababaka musanvu baakuba ebirayiro ebibakkiriza okufuuka ababaka okwali; Andrew Oulanyah Ojok (Omoror), Herbert Edmund Ariko (Soroti City East), N Robert Mao (Ex Officio, era minisita w'amateeka), Nathan Itungo Twesigye (Kashari South Constituency), Eddie Kwizera Wa-Gahungu (Bukimbiri), Derrick Orone (Gogonyo) ne Gideon Thembo Mujungu (Busongora South).

Palamenti yalonda ababaka 9 abakiikirira Uganda mu lukiiko lwa Palamenti y'Obuvanuba bwa Afrika nga September 29, 2022 okuli; Jacqueline Amongin, Veronica Kadogo Babirye, Rose Akol (NRM), Paul Mwasa Musamali (NRM), George Stephen Odongo (NRM), Dennis Namara (NRM), Mary Mugenyi (NRM), James Kakooza (NRM) ne Gerald Siranda (DP).

Waliwo ababaka abaaafuna olukusa lwa Palamenti olubakkiriza okubaga amateeka ag'enjawulo agakwata ku nsonga ez'enjawulo ezinyiga abantu.

## ETTEEKA LY'EBIYIYE

**Hilary Kiyaga mubaka Mawokota North Constituency**, yaleeta ebbago ly'etteeka lya 'The Copyright and Neighbouring Rights (Amentment) Bill' erifuga ebiyiye nga July 20, 2022 era Palamenti n'emuwa olukusa.

Etteeka lino ligenderera



Omubaka Hilary Kiyaga

okukuuma eddembe ly'abakola ebiyiye omuli abayimbi, bannakatamba n'abaliko obuvumbuzi bwe babeera bakoze.

Kiyaga agamba nti, etteeka eririwo erya Copyright and Neighbouring Act teribawa kimala nga bwe kyandibadde ku muntu eyafumba omutwe n'ateekawo ekintu.

"Embeera y'okuba ng'abayimbi tebaganyulwa mu ntuyiyo zaabwe y'ensonga lwaki bangi tebafunye kimala. Etteeka liteekawo ebibonerezo ku bagezaako okujingirira n'okweyambisa ebikoleddwa abalala nga tebasoose kufuna lukusa.

Omubaka w'abakozi Abdul Byakatonda eyasemba etteeka agamba nti, ekisaawe ky'okuyimba ne katemba kisikiriza abantu bangi naye abasinga tebafuna mu bye bakola.

Kiyaga agamba nti, bwe yafuna olukusa lwa Palamenti, kyakkaanyizibwako akolagane n'ekitongole kya Uganda Law Reform Commission abavunaanyizibwa okubaga amateeka.

Mu kiseera kino aba Law Reform Commission baamutegeeza nti, omulimu gwagwa era ne baguweereza mu ofiisi ya Ssaabawolereza wa Gavumenti



Omubaka Anna Adeke

alina okutwala etteeka mu Kabineeti. Alindiridde tteeka lwe linaavaayo.

## ETTEEKA KU BBEEYI Y'EBIRIME

Omubaka Abed Bwanika (Kimaanya-Kabonerera) yaleeta etteeka mu Palamenti eriteekawo enkolagana wakati w'omulimi n'agula ebirime erya 'The Contract Farming Bill'.

Mu tteeka lino eryayanjulwa nga August 23, 2022, Bwanika agamba nti, walina okubeerawo endagaano wakati w'omulimi n'omuguzi w'ebirime ku bungi bw'ebintu n'omutindo era ne bakkaanya ku bbeeyi kwe balina okutundira mu kiseera ekigere.

Bwanika era agamba nti, etteeka lino lyakuyamba omulimi okwewala okukolera mu kuteeberera, nga tebakyanoonya butale.

Stella Apolot (mukazi/Ngora) eyasemba etteeka agamba nti, enkola y'okukola endagaano mu kiseera kino eri ku birime bitono nga ebikajjo n'amajaani.

Etteeka lino lyakuyamba abantu okwongerera ku bungi bw'ebirime era bongere n'okufunamu.

Bwanika yagambye nti, yamala dda okubaga etteeka lino nga mu kiseera kino anoonya Sipiika asobole okumufunira



Omubaka Abed Bwanika

obudde ku lukangaga lw'ebintu ebinaateesebwako alyanje.

## ETTEEKA LY'OKUKABASSANYA ABAKAZI

Palamenti yawa olukusa **Anna Adeke (mukazi/Soroti)** okuleeta etteeka erikangavvula abakabassanya abakazi n'abawala mu nsonga z'omukwano erya 'The Sexual Offences Bill' nga May 23, 2023 mu lutuula olwakubirizibwa omumyuka wa Sipiika, Thomas Tayebwa.

Adeke yategeeza nti, etteeka lino yali alikomezzaawo omulundi gwakubiri kuba eryasooka erya Sexual Offences Bill 2019, eryayanjulwa nga November 2019 ne liweerezebwa mu kakiiko k'amateeka okulyekenneenyi, ekisanja kya Palamenti ye 10 kyaggwaako nga terikoleddwaako.

"Wadde nga Uganda ezze eyisa amateeka agakwata ku nsonga eno, kyokka ebikolwa by'okukabassanya abakazi bikyaliiwo era byeyongerera. Bw'otunuulira lipooti eyakolebwa mu 2016 aba Uganda Demographic and Health Survey yalaga nti, abakazi 22 ku buli 100 abali wakati w'emyaka 15 ne 49 baali bakabassanyiziddwako mu nsonga z'omukwano" Adeke bw'agamba.



Kino alumiriza nti, kiva mu kubeera ng'amateeka agaliwo makadde agalimu ebibonerezo ebinafu ate nga tekinologiya abamu gwe bakoze ebiseera bino tali mu mateeka makadde.

Adeke bwe yali afuna olukusa lwa Palamenti, Ssaabawolereza wa Gavumenti, Kiryowa Kiwanuka yakiwakanya ng'agamba nti, amateeka agaliwo gamala tewali bwetaavu bwa tteeka ddala. Kyokka Sipiika bwe yabuuza ababaka abasinga ne bakkiriza baleete etteeka eddala. Adeke yategeezeza BUKEDDE nti, omulimu gutambula bulungi era ekiseera kyonna ligenda kujja mu Palamenti lisomwe omulundi ogusooka.

## ETTEEKA KU NKOZESA Y'OMWENGE

**Sarah Achieng Opendi (mukazi/Tororo)** yafuna olukusa lwa Palamenti agende abage etteeka erikwata ku nkozesa y'omwenge erya The Alcohol Control Bill nga November 8, 2022.

Etteeka ligendereddwa okulunganyama abakola omwenge, abaguyingiza mu ggwanga, abagutunda n'abagunywa. Lyaleetebwa mu mutima gw'okutangira abantu obulabe bwomwenge nga endwadde n'ebizibu ebirala ebigenderako.

Etteeka lino ligenda kusikira agaliwo okuli; The Liquor Act, the Portable Spirit Act, ne The Enguli (Manufacturing and Licensing) Act, gona agaakolebwa mu myaka gya 1960.

**BIRAZE KU P15**



Omubaka Sarah Achieng Opendi

## ETTEEKA KU BUFUMBO

**Sarah Achieng Opendi (mukazi/Tororo)** yaleeta etteeka erikwata ku bufumbo erya The Marriage Bill nga July 21, 2022.

Opendi agamba nti, yayagala aleete etteeka limu nga lizingiramu amateeka ag'enjawulo agakwata ku bufumbo kuba etteeka eririwo ery'obufumbo erya

Marriage Act lyakolebwa mu mwaka gwa 1904 era nga terikyusibwagako.

"Mu kifo ky'okubeera ng'amateeka agakwata ku bufumbo geeyawudde, kisaana gona tugagatte wamu lifuuke etteeka limu.

Okugeza mu tteeka ly'aleeta ayagala gufuuke musango omusajja okusaba ebintu bye yatwala ku buko ng'abadde

ayawukanye mu mukazi we. Kino ekirungi ne kkooti etaputa konsitiyusoni yakigaana mu musango gwa 'The Constitutional Appeal No. 02 of 2010', Opendi bwe yagambye.

Etteeka ligenda kulunganyama ku bintu ebiberako nga engabanya y'ebintu mu bufumbo obulimu omukazi omu n'obwabakazi abangi, engabanya y'amaka amakulu,

engabana y'ebiyobugagga ebikoleddwa abafumbo bombi n'ensonga endala.

Opendi yagambye nti, akyakola okwebuuza ku bantu ab'enjawulo abakwatibwako era oluvannyuma asabe Minisitule y'ebyensimbi emuwa ebbaluwa ekakasa nti, erina obusobozi bwa ssente z'okutekesa etteeka mu nkola (Certificate of Financial Implication).



**Omulimi ng'afuuyira emboga ze. Etteeka erinaayamba ku bbeeyi y'ebirime likolebwako ekinaataasa abalimi okudondolwa**

**Etteeka ku batunda ebitaweze likolebwako**

BIVUDEDE KU P14



**Omubaka Muhamad Ssentayi**

**ETTEEKA ERIKUUMA ABAKOZESA EBINTU**

**Omubaka Muhamad Ssentayi (Bukoto County West)**, yafuna obukusa okuva mu Palamenti nga November 8, 2022 olumukkiriza okuleeta etteeka erikuuma abaguzi b'ebintu eby'enjawulo. Ssentayi agamba nti, etteeka lya The Consumer Protection and Management Bill, liyamba okukuuma omutindo n'okuba ng'ebintu ebitundibwa ku katale byesigika. Etteeka lirimu obuwaayiro obuteekawo ebibonerezo eri abatagoberera mateeka awamu n'okutangira abantu abakuba obulango obubuzaabuzi abaguzi. Kino kyagendererwamu okulaba ng'omuguzi afuna ekintu ekigya mu sseente z'aba akisasulidde. Ebikolwa by'obufere, obutali bwesigwa n'okutunda ebintu ebitawera oba ebitatuukana na mutindo byonna biteerreddwaako ebibonerezo. Francis Mwijukye (Buhweju) yagambye nti, etteeka lino lyakuyamba okukuuma omutindo kuba waliwo embeera ezizze zituukawo Gavumenti n'egaana bbanka z'ebiyobuubuzi okwongeza amagoba, kyokka ne bakola byabwe. Mu mbeera eno omuntu obeerera osobola okuwawaabira bbanka.

**Engeri Palamenti gy'etuusizza eddoboosi ly'abantu eri gavumenti**

Bya MUSASI WAFFE

PALAMENTI erina obuvunaanyizibwa obw'okukuba ttooci mu mirimu egikolebwa amasiga ga Gavumenti amalala okuli essiga erifuga, n'essiga eddamuzi, okusobola okulaba ng'eggwanga litambula bulungi awatali kunyigiriza muntu wa bulijjo.

Mu mwaka gwa Palamenti oguwedde, Palamenti erina ensonga z'eyingiddemu nga zaali zikwatiddwa bubi abantu abamu abaddukanya emirimu gya gavumenti, era okukkakkana nga zitereezeddwa, abaali banyigirizibwa ne bafuna obuweerero.

Palamenti era ng'eyita mu buvunaanyizibwa bwayo obw'okukiikirira abantu, ng'Ababaka baleeta ensonga eziruma abantu mu bitundu byabwe, waliwo ebintu ebikoleddwa gavumenti, nga bigasa abantu nga bino wammanga:

**PALAMENTI LWE YATAASA ABASUUBUZI B'OMUCEERE**

Mu May wa 2022, Palamenti yayingira mu nsonga z'abasubuzi b'omuceere okuva e Tanzania abaali beemulugunya ku misolo ne sseente ezitategerekeka ezaabaggyibwangako ku nsalo nga bayingiza omuceere, ezaali zivuddeko ebbeeyi y'omuceere okwekanama mu ggwanga.

Abasuubuzi b'omuceere nga bayita mu bakulembeze baabwe okwali; Livingstone Ssenyonga owa Kampala Rice Traders Association ne Isaac Kashaija owa Rice Business Sector Association, baaleeta okwemulugunya kwabwe eri omumyuka wa sipiika Thomas Tayebwa ng'abasubuzi bangi balemereddwa okuyisaawo emmaali yaabwe lwa misoso egisusse.

Nga May 5, 2022, Tayebwa yalagira akakiiko ka Palamenti akakola ku nsonga z'obusuubuzi, amakolero n'ebiyobulambuzi, akakulirwa Omubaka Mwine Mpaka (Mbarara City South) okunoonyereza ku nsonga eno kakole lipooti Palamenti kw'eneesinziira okusalawo.

Omubaka Mpaka yaleeta lipooti nga August 10, 2022, nga bazudde abasuubuzi bwe baali baggyibwako sseente z'omusolo ogwa VAT emitwalo 18 ku buli ttani ya muceere, naye nga kino kikolebwa mu bukyamu kubanga omusolo

guno gwali gwawerebwa dda omukago gw'amawanga agali mu buvanjuba bwa Afrika.

Kkampuni eyali yateekebwawo minisitule y'ebiyobuubuzi okusolooza sseente zino, eya Rice and Agribusiness Development Foundation (RADFO), nayo lipooti yalaga nti, yali emirimu egikola mu bukyamu era n'esemba kkampuni eno eveewo bunnambiro.



**Omubaka Solomon Silwany**

Oluvannyuma lwa Palamenti okuyisa lipooti eno, RADFO yaggyibwa ku nsalo e Mutukula ate n'omusolo ogw'emitwalo 18 ku buli ttani ya muceere nagwo ne guwerebwa bunnambiro.

**Livingstone Ssenyonga, Sseentebe w'abasubuzi b'omuceere mu Kampala**, yagambye nti, okuva Palamenti lwe yayingira mu nsonga z'omuceere, bizinensi kati yatereera era basuubula bulungi

**ENSIGO Z'ABALIMI**

Abalimi mu ggwanga emitima gyali gibeewanise, oluvannyuma lwa gavumenti okuggyawo enteekeeteeka y'okugabanga ensigo nga sizoni y'okulima etuuse, sseente ezaali zigula ensigo n'eziteeka mu nteekateeka y'oku miruka eya Parish Development Model.

Wabula Ababaka ba Palamenti baakizulu nga okusalawo kuno kwali kwa bulabe eri eggwanga, kubanga kyali kigenda kuleeta ebbula ly'emmere.

**Wano Omubaka Solomon Silwany (Bukooli County Central)** we yasinziira n'aleeta ensonga eno mu Palamenti, ng'alabula nti, abalimi bwe bataweebwa nsigo, kyandireeta enjala ani amuwadde akatebe okugwa mu ggwanga.

Ababaka nga tebeetemyemu, baawa gavumenti amagezi okuggya sseente z'okugula ensigo mu nkola ya PDM, kubanga si buli mulimi nti, ali mu nkola eno, ate era nga tennaba kunnyikira bulungi mu bantu. Ensonga endala ababaka gye baawa, ye y'okuba ng'abantu bwe



**Katikkiro wa Uganda, Robinah Nabbanja**

banaafuna sseente za PDM, bayinza okukyusa eby'okukola ne balema okugula ensigo, sizoni n'eggwaako ng'eggwanga teririna mmere emala.

Sipiika wa Palamenti, Anita Annet Among yalagira minisita w'ebiyobulimi ne minisita w'ebiyensimbi okukola ku nsonga eno mu bwangu sseente z'ensigo bbiriyooni nnya ziggyibwe mu PDM gavumenti eguliremu abalimi ensigo.

Nga March 30, 2023, Minisita w'ebiyensimbi Matia Kasaija yakkiriza sseente z'ensigo bbiriyooni nnya, ziggyibwe mu PDM zigulire abalimi ensigo, ekintu ekyakolebwa era ababaka ba Palamenti ne batandika okugaba ensigo zino eri abalimi mu nkola emanyiddwa nga NAADS/Parliament Food Security Arrangement.

**NAKASEKE CENTRAL COUNTY YAFUNA OLUGUUDO LWA KKOOLAASI OLUOSOORE**

Emirimu gy'Ababaka ba Palamenti giri ena okusinziira ku Ssemateeka w'eggwanga. Kuliko okukola amateeka agaluyanyama eggwanga, okukola embalirira y'eggwanga, okulondoola emirimu gya gavumenti, n'okuleeta ebizibu ebiruma abantu eri baminisita abavunaanyizibwa basobole okubikolako.

Okuyita mu buvunaanyizibwa bw'okuleeta ebizibu ebiruma abantu, **Omubaka Allan Mayanja (Nakaseke Central County)**, yaleeta enfunda nnya ensonga y'oluguudo lwa Luweero - Kiwoko - Butalangu, olugatta disitulikiti y'e Nakaseke ku y'e Luweero.

Okusinziira ku Mayanja, oluguudo luno ebbanga lyonna lubadde mu mbeera mbi ate nga lukozesebwa abantu bangi, ekyaleetawo okufiirizibwa ennyo naddala mu



**Omubaka Allan Mayanja**

balimi n'abasubuzi b'ebirime, ng'ebintu byabwe bigenda okutuuka mu katale nga byoonese.

Ensonga eno Palamenti yagiremerako, era n'eteeka minisitule y'ebiyenguudo ku nninga ennyonyole ekiremesizza okukola oluguudo luno, ate ng'ebbanja lya sseente ez'okuluzimba Palamenti yaliyisa mu 2017.

Nga June 1, 2023, oluguudo luno lwatandise okukolebwa, era kisuubirwa, lwakuggwa nga June 1, 2025.

Okusinziira ku Mubaka Mayanja, kontulakiti eyakoleddwa okuzimba oluguudo luno, emirimu ebitundu 80 ku 100 girina kuweebwa batuuze mu bitundu oluguudo mwe lugenda okuyita omuli Magoma, Kiwoko, Kabubbu, Kasana n'ebirala.

Yalaze essanyu, olw'okukolebwa kw'oluguudo luno, n'agamba nti, abalimi ba muwogo, lumonde, amatooke, n'abasubuzi b'ebirime, bagenda kwangyirwa okutuuka ku katale akanene e Luweero ne Kampala basobole okufunamu mu bye balima.

**EDDAGALA LY'OBUSAANYI OBULYA EBIRIME**

Palamenti era yayamba abantu b'e Nakaseke abasangibwa mu magombolola okuli; Wakyato, Butalangu Town Council, Kinyogoga, Ngoma ne Kikoni, okufuna eddagala eritta obusaanyi obulya emmere, n'addala kasooli, amalagala, muwogo n'omuddo. Obusaanyi buno buyitibwa African Army Worm.

Ensonga eno yaleetebwa Omubaka Mayanja nga March 30, 2023, era Palamenti n'eragira Minisitule y'ebiyobulimi okutwala eddagala eritta obusaanyi buno e Nakaseke mu bwangu ddala okusobola okutaasa abalimi, balema kukosebwa mu makungula, ekiyinda okuvaako ebbula ly'emmere mu kitundu ekyo.

Katikkiro wa Uganda, Robinah Nabbanja yateekamu amaanyi mu nsonga eno, era Minisitule y'ebiyobulimi n'etwala eddagala eri abalimi b'e Nakaseke ne bafuuyira ebirime byabwe, embeera n'etereera.

**OKULWANYISA KOOKOLO**

Okusinziira ku ddwaaliro lya kookolo, erya Uganda Cancer Institute, abantu 33,000 be bazuulibwamu kookolo buli mwaka mu Uganda. Wabula ekyeraliikiriza, abantu 7,400 bokka be bafuna obujanjabi okuva ku ddwaaliro lino, ate nga nalyo likyalina okusoomozebwa kw'omujuzo.

Wano Bannalotale we baasinziira okutandika emisinde gya Rotary Cancer Run, egigendereddwaamu okufunamu sseente ez'okulwanyisa kookolo mu Bannayuganda. Palamenti ezze eteeka sseente mu misinde gino, okusobola okulaba nga egatta ettoffaali ku mulimu gw'okulwanyisa kookolo mu ggwanga.

# Palamenti eye 11 eyisizza amate

Bya MUSASI WAFFE

OMWAKA ogwokubiri ogwa Palamenti eye 11 ogwaweddeko mu May. Ababaka bayisizza amateeka 32 ng'agasinga gakwata ku nsonga eziruma Bannayuganda.

Omwaka gwa Palamenti nga bwe gwatandika mu June wa 2022, kiba kitegeeza nti, kumpi buli mwezi Palamenti ebadde eyisa amabago g'amateeka kumpi asatu (3).

Kyokka agasinga okukwata ku bantu obutereevu mulimu; erirwanyisa obutujujju erya 'The Anti-Terrorism (Amendment) Bill' 2022, Etteeka erirwanyisa enkokesa embi eya kompyuta erya 'The Computer Misuse (Amendment) Bill' 2021, Erirwanyisa eby'okuvuba n'okulunda ebyennyanya erya 'The Fisheries and Aquaculture Bill', 2022.

Etteeka ly'obutale erya 'The Markets Bill' 2021, Erirwanyisa abantu b'ekikula ekimu okweganza erya 'The Anti Homosexuality Bill', 2023 n'erya Traffic and Road Safety (Amendment) Bill' 2022 erirwanyisa entambula y'oku nguudo.



Omubaka Asuman Basalirwa

## ETTEKA ERIRWANYISA OBUFUMBO BW'EKIKULA EKIMU

Nga May 2, 2023, Palamenti yayisa etteeka erirwanyisa abantu b'ekikula ekimu okweganza n'okufumbiriganwa nga May 2, 2023, era Pulezidenti n'alissaako omukono nga May 26, 2023.

Etteeka lino lyaleetebwa omubaka Asuman Basalirwa (Bugiri Munisipaali) n'ekigendererwa ky'okulwanyisa omuze guno.

Palamenti yasooka n'eyisa etteeka lino nga batadde mu ebibonerezo ebikakali. Kyokka bwe baalitwala ewa Pulezidenti okulissaako omukono n'alikomyawo eri ababaka

ne babeerako ennongoosereza ze baakola.

Mu byakyusibwa, omuntu okubeera ng'akkiririza mu kwagalana okw'ekikula ekimu si musango, wabula gubeera musango bw'abiyigiriza abaana, okukaka omulala n'okubikola n'atanneetuuka.

Bw'okwatibwa ng'oliko engeri yonna gy'owagiramu ebikolwa bino, bwe gukusinga osibwa emyaka 20 nga bwe kibeera kitongole kiwerebwa okumala emyaka 10.

Kyokka era omuntu ne bwe babeera bakulu nga ba kikula kimu ne bakkiriziganya okweyagala gubeera musango mu tteeka lya Penal Code.

Etteeka likuuma abaana abato obutayingizibwa mu mize gya kikula kino egy'obulabe ennyo eri obuwangwa, eddiini n'ennono z'eggwanga.

Sipiika wa Palamenti, Anita Among yategeeza nga bamaze okuyisa etteeka nga bwe waliwo abaali bamutiisatiisa olw'okuyisa etteeka. Kyokka yategeeza nga bwe yali tasobola kutiisibwatisibwa olw'abeekwasa okugaba obuyambi kuba ekikolwa kino kisaanyaawo obutonde.



## ETTEKA ERIRWANYISA OKUKOZESA OBUBI KOMPYUTA

Palamenti yayisa etteeka erirwanyisa okukozesa obubi emikutu kalimagezi egya kompyuta eryaleetebwa omubaka Muhammad Nsereko (Kampala Central) era Pulezidenti n'alissaako omukono.

Etteeka ligaana okweyambisa ekifaananyi ky'omuntu ku mikutu gya Social Media nga tosoose kufuna lukusa kuva gy'ali.

Ligaana n'okusasaanya ekintu kyonna ekisiga obukyayi eri omuntu yenna, eggwanga, eddiini, ekikula ky'omuntu oba omwana atannaweza myaka 18 okuggyako ng'ofunye olukusa okuva mu bazadde oba abamulabirira.

Bwe gukusinga ogw'okusaasaanya eddoboosi oba akatambi k'omuntu omulala nga takukkirizza bakuweesa engassi ya bukadde 10 oba okusibwa emyaka egitasukka 10 oba okuweebwa ebibonerezo byombi.

## ETTEKA LY'OBUVUBI

Palamenti yayisa etteeka erirwanyisa eby'obuvubi erya 'The Fisheries and Aquaculture Bill, 2021'.

Etteeka lino lyasooka kuyisibwa



Etteeka erirwanyisa abavubi lyayisibwa

nga May 3, 2022 kyokka bwe baalitwala Pulezidenti n'agaana okulissaako omukono ng'agamba kyali kikyamu okugamba nti, obuvunaanyizibwa bw'okukwasisa amateeka bulina kuweebwa Poliisi yokka.

Kino yagamba nti, kyali kikyamu kuba abakozesa envuba embi si bangu era kyetaaga poliisi n'eggye lya UPDF bakolere wamu.

Waaliiwo okusika omuguwa mu Babaka ku Poliisi ne UPDF asaaidde okulekerwa obuvunaanyizibwa ku nnyanja. Kyokka oluvannyuma, minisita



Omubaka Muhammad Nsereko

w'ebuyobulimi n'obuvubi, Frank Tumwebaze we yaleetera ekirowoozi ekyawagirwa nti, obuvunaanyizibwa bunu bulekerwe Pulezidenti ng'omuduumizi ow'oku ntikko okusalawo ekitongole ekinaaba kyetaagisizza okukuuma ennyanja.

Kyokka kino abababaka b'oludda oluvuganya baakiwakanya. Waatondebwawo ekifo kya 'Chief Fisheries Officer' avunaanyizibwa ku by'envuba aija okuyambibwako District Fisheries Officer mu kutuukuriza obuvunaanyizibwa bwe.

## Etteeka erirwanyisa ob



Pulezidenti Museveni (ku ddyo) bwe yali e Kaweweta ku mukolo gw'abaserikale

## ETTEKA ERIRWANYISA OBUTUJUJJU

Nga August 23, 2022 Gavumenti ng'eyita mu minisita avunaanyizibwa ku nsonga z'ebweru w'eggwanga Gen. Jeje Odong yaleeta etteeka erirwanyisa obutujujju erya 'The Anti-Terrorism (Amendment) Bill, 2022'.

Wadde nga waaliwo etteeka ekkadde ery'obutujujju, kyokka kyazuulwa ng'abatujju baali

bakuguse naddala mu ngeri gye batambuzaamu ssende okuzitwala mu mawanga amalala.

Mwateekebwamu ebibonerezo ebikambwe eri omuntu oba ekitongole ekinaasangibwa nga batambuza ssende z'abatujju ne bassaawo ekibonerezo kya kusibwa emyaka egitasukka 20 oba okuwa engassi ya buwumbi 10 oba okukola ebibonerezo byombi.

ETTEKA ERIRWANYISA LYAMA... Palamenti yayisa etteeka erirwanyisa enkokesa embi eya kompyuta erya 'The Computer Misuse (Amendment) Bill', 2021...

Etteeka lino lyaleetebwa omubaka Asuman Basalirwa (Bugiri Munisipaali) n'ekigendererwa ky'okulwanyisa omuze guno.

Omubaka Muhammad Nsereko





# Ebiteeso 4 Palamenti by'ereese okukyusa embeera y'omuntu waabulijjo

Bya MUSASI WAFFE

OKUTEREEZA embeera y'omuntu waabulijjo, kye kimu ku bigendererwa bya Gavumenti, okusinzira ku nteekateeka y'okukulaakulanya eggwanga eri mu biruubirirwa by'eggwanga eby'omwaka 2040 (Vision 2040).

Ekgendererwa ekikulu kya kusitula Uganda okuva mu mbeera y'obwavu ejjudde abantu abakolerera olubuto lwokwa, okugifuula ensi eri yaddeyaddeko mu byenfuna ng'abantu basobola okukolerera olubuto ne bafissa bye batunda okufuna sseente ezibayamba mu byetaaga ebirala n'okuterakako.

Wabula okutuuka ku kiruubirirwa kino, waliwo ebyetaaga okukolebwako gavumenti mu byobulamu, ebyenjigiriza, okutondawo emirimu, okuzimba enguudo, okunoonya obutale, n'ebirala okusobozesa abantu okutambuzi obulungi emirimu gyabwe.

## PALAMENTI ETANDISE KU LUGENDO

Palamenti nga erimu ku masiga agakola Gavumenti, etandise kaweeefube okulaba ng'abantu baabulijjo babeera mu bulamu obweyagaza, ng'eyita mu kuyisa ebiteeso ebigendereddwaamu okuwabula n'okujjukiza gavumenti ku birina okutandikirwako mu lugendo lw'okukulaakulanya abantu.

Mu ntula za Palamenti ez'omwaka gw'ebyensimbi oguwedde, 2022/23, ebiteeso eby'enjawulo byayisibwa Palamenti ey'awamu ne biwagirwa ne gavumenti nga bikwata ku kuyisa bulamu bwa Bannayuganda.

## 1 EBITEESO KU BYOBULAMU

Okusinzira ku nnyingoye eya 56, ey'amateeka agafuga ababaka ba Palamenti nga bakola emirimu gyabwe, buli mubaka alina eddembe okuleeta ekiteeso mu Palamenti ey'awamu, ne kikubaganyizibwako ebirowoozo,

oluvannyuma ne kiyisibwa.

**Nga July 6, 2022, Omubaka Charles Ayume (Koboko Munisipaali, ku kkono)**



yaleeta ekiteeso ekisaba gavumenti okukulembeza eky'okusiga sseente mu malwaliro agali ku mutendera gwa Health Centre IV, kubanga gayamba abantu bangi, kyokka ng'ebikozesebwa bye galina bitono ddala nga waliwo n'obuweereza bwe gatakola ate nga bukulu nnyo eri abantu. Ekiteeso kino Palamenti ey'awamu yakiyisa.

Ayume agamba nti, Bannayuganda abasinga bakozeza malwaliro ga gavumenti okufuna obujjanjabi, naye mangi ku gano gabali wala, amalala tegalina buweereza na bikozesebwa naddala embeera bw'eyingiramu okulongoosa omulwadde.

Kino kivaako abantu okusasula sseente ennyingi mu malwaliro ag'obwannanyini, kyokka nga bandibadde bazitereka ne zibayamba mu birala, abalala bakeberewa naye ne batazuula kituufu kibaluma, ne basigala mu bulumi, kw'ossa okufa okwandibadde kwewalika.

Uganda erina amalwaliro agali ku mutendera gwa Health Centre IV, 183, kyokka okusinzira ku lipooti eyafulumizibwa Minisitule y'ebiyobulamu mu 2021, amalwaliro 31 ku gano tegalina busobozi bwa kulongoosa bakazi abazaala.

Ayume mu kiteeso kye, agamba nti, gavumenti erina okwongera sseente mu Health Centre IV, kubanga abantu abasinga amalwaliro gano gabali kumpi, nga bwe gatereezebwa, kijja kukendeza ku mujuzo oguli mu malwaliro amanene, ate n'omuwendo gw'abantu abafa olw'endwadde n'embeera ezeewalika nagwo gukendeere.

Abasawo abakola mu malwaliro gano, nabo Ayume agamba nti, omuwendo gwabwe gwetaaga kwongerako okusobola okukola amangu ku balwadde.

Ebyuma ebiteraka omusaayi nabyo Palamenti yasaba gavumenti okubyongerako, okusobozesa amalwaliro ga Health Centre IV okukola ku bantu abetaaga omusaayi baleme kufa.

## MINISITA ACENG AWAGIRA EKITEESO KY'OKUTEKA SSENTE MU HEALTH CENTRE IV

**Minisita w'ebiyobulamu, Dr Jane Ruth Aceng,** awagira ekiteeso kino, era agamba nti, pulaani ya gavumenti ya kulaba nga buli konsittyuwensi ebeera

n'eddwaaliro eriri ku mutendera gwa Health Centre IV, ate buli disitulikiti ebeere n'eddwaaliro



eddene.

Wabula Aceng agamba nti, eddwaaliro lya disitulikiti kirooto kiwanvu era kijja kutwala emyaka egiwerako okutuukirizibwa, ng'ekisinga kwe kuteeka sseente mu Health Centre IV nga Palamenti bwe yakiteesa, era ku lwa gavumenti ly'ekkubo lye bagenda okukwata.

## 2 EKITEESO KU BULWADDE BW'EMITWE

Palamenti mu mwaka gw'ebyensimbi oguwedde, yayisa ekiteeso ekisaba gavumenti okuteeka essira n'okukulembeza ekizibu ky'obulwadde bw'emitwe okutaasa Bannayuganda abafa oluvannyuma lw'okwetuga, n'abo abazitooweereddwa ensi olw'ebirowoozi ebingi ebibaviramu obulwadde.

Okunoonyereza okwakolebwa Minisitule y'ebiyobulamu, n'ekitongole ekigatta ababudaabuda abantu ekya Uganda Counselling Association, kulaga nga Bannayuganda obukadde 14 balwadde ba mitwe.

Wadde ng'omuwendo guno gweralikiriza, naye ekizibu kino tekifiriddwaako nnyo okusobola okuyamba abantu okuvvuumuka embeera eno.



## ESSIRA LISSIBWE KU BALWADDE B'EMITWE

Wano **Omubaka Aisha Kabanda (mukazi / Butambala)** we yasinziira n'aleeta ekiteeso ekisaba gavumenti okuteeka essira ku bujjanjabi bw'obulwadde bw'emitwe, Bannayuganda basobole okweyagala obulungi n'okukola emirimu nga tewali kibataataaganya.

Kabanda agamba nti, kyennyamira okulaba nga wadde abalwadde b'emitwe bangi, naye abasawo abajjanjaba emitwe bali 42 bokka, nga be balina okulabirira eggwanga lyonna.

Olw'obutaba na malwaliro gamala gakola ku nsonga ya mitwe, abeetoolodde omuntu alwadde basalawo kumulijja ku miguwa, n'afundikira nga yeeyongedde okulwala, ate n'eddembe lye nga

limuggyiddwaako.

Abazadde abatta abaana baabwe, n'abaana abeetuga nabo bagenda beeyongera, Kabanda ky'agamba nti, kyetaaga okusalira amagezi mu bwangu ddala okusobola okutaasa n'addala abayizi abali mu masomero baleme kumalibwawo bulwadde buno.

Palamenti ey'awamu awatali kwetemamu yayisa ekiteeso kino, era gavumenti n'esabibwa okwongera sseente mu kulwanyisa obulwadde bw'emitwe, ng'etendeka abasawo abamala, okutwala obuweereza bw'okujjanjaba emitwe mu malwaliro ageetoolodde eggwanga, abantu basobole okufuna obujjanjabi mu bwangu ng'obulwadde tebunnaba kubakosa nnyo.

Gavumenti era yasabibwa okuteekawo enkola eneeyamba okulondoola obuweereza ku bulwadde bw'emitwe, okulaba nga butuuka ku bantu bonna okuva ku ba waggulu okutuuka ku ba wansi, waleme kubaawo alekebwa mabega.

# Ababaka bakkaanya ku bbanka y'abalimi

## 3 EKITEESO KU BBANKA Y'ABALIMI

Mu kaweeefube ow'okusitula Bannayuganda okuva mu mbeera y'okukolerera olubuto lwokwa, batuuke ku ddaala ly'okufissa sseente ez'okuterakako n'okukola ku byetaaga ebirala, Palamenti yayisa ekiteeso ekisaba gavumenti okuteekawo bbanka y'abalimi okusobola okuwola abalimi bateeke sseente mu nimiru basobole okwongera ku makungula gaabwe olwo n'ennyigiza yeeyongere.

Nga September 27, 2022, Palamenti yayisa ekiteeso ekisaba gavumenti okuteekawo bbanka y'abalimi, okusobola okubayamba okuwolebwa bongere mu bye bakola. Ekiteeso kino kyaleetebwa Omubaka **Dr Agnes Atim (Mukazi / Amolatar)** era ne kiwagirwa ababaka bonna.

Dr Atim agamba nti, abalimi n'abakola bizinensi ezirya ku bulimi, basanga obuzibu okuwolebwa basobole okwongera mu bizinensi zaabwe, kubanga bbanka z'obusuubuzi zigaba looni eziriko obukwakkulizo obukakali ate ng'abalimi emirundi mingi baba tebalina bye basingayo ekivuddeko okubaleka emabega mu byenfuna.

Bannayuganda 70 ku buli 100 balya ku bulimi era olw'ensonga eno, omubaka Dr Atim agamba nti, kiba kyetaagisa abalimi okubateerawo bbanka esobola okumanya ebizibu byabwe, n'ebafunira looni ezitaliiko bukakkulizo bwa maanyi, kibayambe okwongera ku makungula nga bagula ebyuma ebibayamba mu kulima, n'okugula ensigo n'ebisolo eby'olulyo ebivuganya ku katale.

Ababaka bakkaanya nti, bbanka



**Omubaka Dr Agnes Atim**



**Omubaka Boniface Okot**

y'abalimi esobola okuyamba Bannayuganda okugaggawala nga bayita mu kwongera ku makungula n'okukozesa ebyuma mu kulima n'okulunda, okutondawo emirimu, okufuna emmere emala, n'okukendeza ku bwavu, era ne basalawo awatali kwetemamu nti, gavumenti ekolere abalimi bbanka eyaabwe.

## 4 EKITEESO KYA PALAMENTI KU KUSITULA ABAVUBUKA

Okunoonyereza kulaga nti, abavubuka bali 78 ku buli 100, ku muwendo gw'abantu abali mu ggwanga. Abavubuka bano baba balina okutendekebwa obulungi babeere ba mugaso eri eggwanga, lisobole okukulaakulana. Olw'obukulu bw'abavubuka, Palamenti yayisa ekiteeso nga September 8, 2022 ekisaba gavumenti okuteeka ensonga z'abavubuka ku mwanjo, kubanga abavubuka ly'eggwanga ery'enkya. Ekiteeso kino kyaleetebwa **Omubaka Boniface Okot (Bavubuka/Bukiikakkono)**, era Palamenti yonna n'ekisemba.

Okot agamba nti, wadde abavubuka bakulu okuzimbibwa nga bateekebwamu sseente

n'obudde, waliwo pulogulaamu ezimu nga balekeddwa emabega. Ebyenjigiriza bye bafuna nabyo byetaaga okutunulwamu kubanga amatendekero agamu bye gasomera tebikwatagana na bukugu bwetaagibwa ku katale k'emirimu.

Okot asema gavumenti okwongera amaanyi mu kutendeka abavubuka ebyemikono

basobole okweyimirizaawo, n'okufuba okulaba nga sseente eziteekebwawo nga za kuyamba bavubuka bazifuna awatali muziziko.

Obuweereza mu byobulamu n'ebyenjigiriza Okot agamba nti, bulina okuba nga bugasa abavubuka ate nga basobola okubufuna.

Okot era agamba nti, abavubuka ly'eggwanga ery'enkya, era gavumenti erina okubateeka ku mwanjo n'okubeebuuzako mu kusalawo okukolebwa ku nsonga ez'enjawulo, omuli n'okukuuma obutonde bw'ensi.

Palamenti yasalawo nti, kikulu abavubuka okubatemera ekkubo okuyita mu kubasitula mu byobulimi, ebyobusuubuzi n'amakolero, emirimu gy'obuweereza n'okwetandikirawo egyabwe, kw'ossa ebya kompyuta, obuyiira n'ebyemizannyo.

Ababaka bagamba nti, eggwanga lijja kuba mu mikono mituufu, abavubuka bwe banassibwa ku mwanjo, ne bayambibwako okukula n'okukulaakulana. Era baalabula nti, abavubuka bwe bataafibweko, eggwanga lyolekedde akatyabaga.